

Suenq lo, gwn ba, baezneix itdingh daengq lauxbanj gou mbouj coq manh, wnggai gwn ndaej roengz ba! Hoeng lauxbanj mbouj coq manh couh mbouj rox guh faenjsae lo, baezneix ndaw vanj lij dwg miz di manh, raemxdang hoengzdwgdw. Byawz rox, faenj baez haeuj bak, dai lo! Hanh, raemxda caeuq mug couh lae roengz huhu, gou roengzrengz bae gwn amq daihngaih, hoeng baenzlawz cungj ndwnj mbouj roengzbae, daengx fajnaj hix ndingfwgfwg.

Gobiujngeih raen mbouj deng lo, couh cam gou: “Baenzlawz la? Mbouj dwg manh lai ba?” Gou ngaekngaek gyaauj, gobiujngeih lij siengj bae cawx vanj mbouj manh hawj gou cimz, hoeng, gou dai cungj mbouj haengj. Doeklaeng, faenjsae gou couh roengz ndaw dungx gobiujngeih bae lo. Gvaqlaeng, gobiujngeih danqheiq naeuz: “Ai! Gwn mbouj ndaej manh, caen hojsik lai lo, haujlai gijgwn cungj aeu miz manh cij ndei gwn.” Gou ndawsim hix gag ngeix, mingzmingz couh ngamq dwk roengz di manh ndwi, vihmaz baez gwn lij baenzneix manh ne? Baezlaeng caen mbouj gwn lo!

Doeklaeng gou youq Namzningz doeg dayoz, gizneix bouq faenjsae engq lai, doengzhag maij gwn faenjsae hix engq lai lo, mwngz yawj, ndaw suzse dou gouj boux vunz couh miz bet boux maij gwn faenjsae! Gyoengqde rox gou mbouj haengj gwn faenjsae

seiz, hix gangj hojsik nyauznyauz. Miz boux doengzhag ndeu doiq gou naeuz: “Mwngz mbouj haengj gwn faenjsae dwg aenvih de manh lai ba? Yienghneix, baezlaeng mwngz caeuq gou bae gwn, ngamq hainduj gwn couh cuengq noix di manh, gizneix mbouj lumj Liujcouh, di manh neix mwngz haengjdingh gwn ndaej.”

Yawj gyoengqde gwn ndaej baenzneix feih, gou couh ei de youh bae sawq baez moq. Couh lumj de gangj, youq Namzningz gou gwn ndaej di manh ndeu dahraix, hix hainduj raen faenjsae ndei gwn lo, baez bae baez dauq, gou gwn faenjsae hix mbouj miz maz geizheih lo.

Hoeng, dayoz seiq nienzgaep bihaenx, gou youh gangj “mbouj caiq gwn faenjsae” coenz vah neix lo. Ngoenzhaenx, gou siengj bae cawx faenjsae ma gwn, Siujmungz hix siengj gwn, couh heuh gou bang de cawx. Bae daengz bouq faenjsae, gou naeuz

mehlauxbanj gou aeu song vanj faenjsae, de riengjret dwk bang gou dajbau ndei, gou dawz mbaw ngaenz 20 maenz ndenq gvaqbae hawj de couh baenqdauq.

Ngamq byaij geij yamq, gou couh geiq hwnj mehlauxbanj caengz bouj ngaenz hawj gou, gou byaij dauq bouq faenjsae gangjmingz cingzgvang. Hoeng, mehlauxbanj ganvad lai lo, dai hix mbouj nyinh de caengz bouj. Gou naeuz: “Song vanj faenj 9 maenz, gou hawj mwngz 20 maenz, mwngz wnggai bouj hawj gou 11 maenz, buhvaq gou youh mbouj miz daeh, danghnaeuz mwngz gaenq bouj hawj gou, gij ngaenz mwngz bouj wnggai youq ndaw fwngz gou ha. Hoeng, ndaw fwngz gou cungj mbouj miz saek maenz, nanzdauh gou lij vut bae ha?” Gou gangj dwk hozhat liux, mehlauxbanj hix mbouj ok hing, ngaenz hix mbouj bouj hawj. Caen ndatheiq ha, baezneix gwnvi lo, mehlauxbanj vaih lai, gou

baezlaeng caiq mbouj gwn faenjsae lo!

Bizyez ra ndaej gunghcoz, miz ngoenz ndeu, baengzyoux rag gou bae aen bouq faenjsae ndeu, de doiq aen bouq faenjsae neix haenh bae haengq dauq, bak cungj mbouj daengx. Gou youh lumz gij vah mwhgonq gou gangj gvaq lo, gig angq dwk aeu vanj faenjsae caeuq aen nohgamou ndeu. Byawz rox, faenj caengz haeuj bak, couh miz duz nengz youh hung youh heu youh ndongqliklik ndeu mbin roengz vanj faenj gou bae, lij youq ndaw raemxdang sangj bae sangj dauq dem! Dai lo! Baezneix maz cungj mbouj siengj gwn lo, gou caeuq faenjsae caen mbouj miz yienzfaenh ha.

Hoeng, mbouj geij nanz gou youh bae bouq faenjsae gwn faenj lo. Sim gag ngeix: Faenjsae gizaed ndei gwn dahraix, hawj vunz gwn le youh siengj gwn.

(sat)

Duz Roegyengj Baklai

鸚鵡多嘴

□ Mungz Ningz / 蒙宁

Miz duz roegyengj ndeu, de bak-lai raeuh, mboujguenj maz saehcingz, de cungj “vala vala” gangj ndaej mbouj dingz.

Miz ngoenz ndeu, ndaw ndoeng-faex hai aen hoih doeg sei, roeg-dingheng doeg souj sei dinj ndeu, youh cingcuj youh ndeidingq, daihgya dingq le cungj dopfwngz hwnjdaej, roeggyaeujhau daxgoeng lij haenh de dem. Roegyengj couh mbouj angq lo, naeuz: “Neix miz maz ak lai, gou hix rox!”

Youh miz ngoenz ndeu, doih douqlwg ndeu youq ndaw ndoengfaex guh yahndoj, lwgdaengoengz, dujrwz-raez, diuzriengdinj…… Gyoengqde bouxbox cungj ndoj hwnjdaej, hawj douqlwg mong bae ra. Douqlwg mong ra ha ra ha, duz ndeu hix ra mbouj ndaej.

Seizneix, roegyengj cingq dingz youq gwnz gofaex sangngaungau ndeu, gigi caca dwk gangj: “Douqlwg mong dwg vunzhuk! Gyoengqde ndoj youq gizlawz, gou gyonj rox. Lwgdaengoengz youq ndaw caz rum, dujrwzraez youq ndaw cong, diuzriengdinj youq baih-laeng ndaek rin……”

Lwgdaengoengz, dujrwzraez, diuz-

riengdinj dingq roegyengj baenzneix gangj, gyonj buet okdaeuj lo, ndawsim gig huj: “Roegyengj caen baklai! De cungj gangj okdaeuj lo, lij ra maz! Mbouj guhcaemz lo, mbouj guhcaemz lo.”

Douqlwg mong naeuz: “Raeuz gaej caeuq roegyengj youq giz ndeu, daengz dieg wng bae guhcaemz.” Gangj sat, couh daiq gyoengq douqlwg buet deuz lo.

Miz ngoenz ndeu, ndaw ndoeng-faex hai hoih ciengqgo. Roegyengj ciengq le souj go ndeu, de ciengq: “Roegyengj, roegyengj, caen coengmingz.” Daihgya dingq le riuhaha, cungj naeuz: “Swhgeij gangj swhgeij coengmingz, caen hojguh!”

Ciepdwk, roeghenj hix ciengq hwnjdaej: “Roeghenj iq, gyaiez hag-sib.” Daihgya dingq le cungj dopfwngz.

Roegyengj gig ndatheiq dwk gangj: “Neix miz maz ak lai! Gou caiq ciengq souj ndeu.” De youh “vala vala” ciengq hwnjdaej.

Daihgya hemq dwk: “Mbouj yungh mwngz ciengq, mbouj yungh mwngz ciengq! Dou mbouj siengj dingq.” Roegyengj remjnaj ndaej cij-ndei mbin deuz lo.



Seizcou bya lij heu.

Cinz Binh ingi

Mbouj geij nanz, ndaw ndoeng-faex daeuj duz manaez mong ndeu, raen doenghdz iq couh haeb, daihgya cungj haemz de dai bae, couh youq itheij siengj aen banhfap daeuj doiqfouq de. Gyoengqde youq henz roen vat aen gumz laeg, baihgwnz gaq ngafaex, aeu nyangj hoemq hwnj, youq gwnz nyangj caiq hoemq gij namh. Loeglwg, lingzlwg, duzcen ndoj youq ndaw caz rum. Douqlwg youq gwnz diegnyw guhcaemz, yinx duz manaez mong gvaqdaej.

Yaep he, duz manaez mong daeuj lo, douqlwg doq coh hongx gyoengqde

guh buet bae. Duz manaez mong doq gyaep, yaek gyaep daengz henz gumz, sawqmwh roegyengj hemq hwnjdaej: “Manaez daeuj lo! Daihgya vaiq bwh rin ndei, caj de doek haeuj ndaw hongx bae couh dub de dai.”

Duz manaez mong baez dingq, hwk ndaej simdiuq, caiq hix mbouj gamj gyaep douqlwg lo, cienq ndang couh buet.

Douqlwg, duzcen, duzlingz, loeglwg cungj huj ndaej hoz yaek dek: “Roegyengj, roegyengj, mwngz baenz-neix baklai, byawz nyienh caeuq mwngz youq itheij guhcaemz ne?”